

補修永濟縣志分目

忠節

孝友

文學

吏治

義行

耆壽

永濟縣志

卷十三

分目

一

永濟縣志卷之十三

忠節

敬釗隋仁壽中爲繁峙令有名漢王諒反兵至釗力戰城陷賊將墨弼臨以兵釗不爲屈弼義而止之執送於喬鍾葵署爲代州司馬釗正色拒之鍾葵曰受命則可否則死釗曰吾爲縣宰逢逆臣反叛進不能保境退不能死節爲辱已多何乃復以僞官相迫也死生有命他非所聞鍾葵將殺之會楊義臣兵至乃獲免釗後終朝邑令

永濟縣志

卷十三

忠節

一

呂子臧隋末爲南陽郡丞唐高祖起兵遣馬元規慰輯山南獨子臧堅守元規使人喻意子臧殺之及煬帝凶問至子臧發喪訖乃送款於唐高祖以爲鄧州刺史與元規共扞朱粲粲兵攻城或勸子臧降子臧曰我天子方伯豈降賊乎帥兵與粲戰死之

李興宋咸平中契丹入寇眞宗幸大名興以東班殿直隨節度使康保裔引兵拒敵與契丹戰河間府軍陷保裔沒於陣興亦死之

景叔範以舉人知山東莒州值明末兵亂莒城破叔範死

之

韓承宣大學士爌孫明末以進士知山東歷城縣大兵至
攻破歷城承宣死之贈光祿少卿有子世琦 國朝入
旗籍官至巡撫

相希尹明末以武進士歷官甘肅副總兵家居值李自成
陷蒲州爲所執大罵不屈與州人參將張夢鯉並爲賊
所殺

樊邦正明末以舉人官湖廣德安府知府張獻忠攻德安
邦正悉力守禦後里居值李自成至攻蒲州破邦正不

永濟縣志

卷十三

忠節

二

屈而死州人稱邦正及相希尹張夢鯉爲三忠

王應寵者蒲州韓氏之僕也有妻妾各一家頗殷應寵所
事韓于宣常官知府時方家居明崇禎十七年正月賊
李自成至蒲蒲人多迎降者賊執蒲搢紳責金餽軍于
宣驚懼與其妻薛皆自死應寵俟于宣殮訖謂妻妾曰
我與爾皆明民義不可降賊當相偕死遂置三繩堂上
而取片木自書曰大明小民王應寵之靈引杯酒與妻
酬勸因令就縊已而妻縊妾從之應寵乃以繩自經明
日賊入其室見三屍陳焉睹所書木皆大驚以告賊將

使其屬殮之太息以去於是州人稱應寵爲義民其後數年有翟鳳翥者傳其事

舊志論曰寵之死偉矣自稱明民不肯辱賊其見義明而蹈節勇有古烈士之風哉非然何以甘於自決而慷慨若斯耶跡其身居臺僕之賤非如搢紳先生素常聞教而服訓以彼其身可以無死然且抱志抗節卒從而死焉其視士大夫之媮冒苟活幸自安全者賢不肖相去何如哉予於忠烈一篇特傳寵以揚其旨亦春秋之意也

忠節補

韓允勳明崇禎三年以副千戶調征流賊遇之於太平縣史村自辰至酉轉戰數十里斬賊魁三人會日暮賊至益眾允勳力盡被執令之降不屈遂爲賊所殺首隕而軀不仆作奮躍狀者再事聞贈安遠將軍太平人立廟祀焉

賈道醕貢士順治中爲太谷教諭攝縣事時姜瓖反於大同太谷爲賊黨所陷道醕死於亂贈國子監助教祀之
太原忠烈廟中

趙禧陝西白土營都司嘉慶二年領兵勦捕本省賊匪力
戰陣亡事聞 賜卹予雲騎尉世職襲次完時 恩騎
尉世襲罔替

馬濟美字亦簪號觀廷雲南臨安府建水縣人由世襲雲
騎尉陞授蒲州協副將 簡任江西九江鎮總兵適逆
匪圍省城帶兵援勦屢著戰功以乘勝窮追力戰陣亡
事聞 賜卹予諡襄愍並行查籍貫事蹟宣付 國史
館立傳入祀昭忠祠因無力回籍呈請准入蒲州府永
濟縣籍另有傳載藝文

永濟縣志

卷十三

忠節

四

崔楨福建順昌縣典史咸豐八年粵匪犯閩攻城城陷楨
帥勇巷戰力竭死之事聞 賜卹予雲騎尉世職

孝友

皇甫奴北魏景明初郡人楊諷等七百五十人上章列稱
皇甫奴兄弟雖沈屈兵伍而操尚並高奉養繼母甚著
恭孝之美於是畿內大使王凝請加表異詔從之

姚棲雲唐貞元中調卒戍邊棲雲父語其兄曰兄嗣未立
宜勿往弟幸有子請代兄行至塞下遂戰歿時棲雲方
三歲其母他適伯母撫養之既長事伯母如母又招魂
葬其父廬於墓左哀慕不衰縣令蘇輒以俸錢買地開
阡刻石而表之河中尹渾瑊上其事詔加優賜表其門

名其鄉曰孝悌里曰節義社曰愛敬

盧操幼好學事繼母張至孝張溺愛已生三子而命操主
炊供食操執勞不倦張遣子就學讀書操爲之執鞭策
驢三子並不肖醉酒忤人人登門詬辱及張操泣拜以
解人曰不忍以三賤累長者相與謝操而去後擢明經
爲臨津尉佐政寬仁每旦必具冠帶誦孝經一篇然後

視事

姚宗明棲雲十世孫也宋慶曆中有司以姚氏十世同居
聞於朝仁宗詔復其家自宗明至其孫德又三世五十

餘年而其家孝睦不替姚氏世爲農有田數十頃聚族百餘人躬事田桑歷唐末五代至宋而子孫保守墳墓不相離散天下未有也

樊珪元至大間爲大都提舉母喪明珪聞之卽日棄官歸以舌舐母目七日而復明有司以聞詔旌其門曰孝感杜昭襁褓中失母其繼母吳撫之甚厚及長事吳甚孝吳卒廬墓三年朝夕哭泣曰吾報之不能盡也

景濬與兄瀾友愛甚至常同出遇盜於路將殺之濬向之叩頭請殺已而免其兄兄亦請殺已而免其弟盜感其

永濟縣志

卷十二

孝友

六

義遂俱釋焉濬後成正德辛巳進士官御史終府丞以清諒知名

張輅者明正德中兄鑑以事觸中人劉瑾瑾怒令郡官收鑑將坐重辟輅詣府自言罪實由己無與鑑也力祈代鑑死太守義而免之

謝奇齡侍母疾衣不解帶居喪廬墓有黃雀入壙之異舊志論曰孝之爲德也豈易言哉必極其至雖賢人君子有所不能盡夫豈尋常一事一節所得遽冒其名乎雖然曾參子騫旣不可見於世必持此以責天下亦非

導民佑俗之方也夫春秋之義善善從長而以行示人期其共勸故自舊史所傳以外列其行事可觀者爲孝德傳以諷厲郡人使有所感而興焉

孝友續

溫錫明貢士有孝行親沒負土成墳居於墓側致野蠶成繭與白蛇之祥又張聖謨亦貢士聖謨父圻事親最孝終身思慕屢表於官聖謨復孝其至行有過人者當選縣丞未仕卒

魏璣幼失怙事母至孝賈四方遇良味必致奉母客三原

永濟縣志

卷十二

孝友

七

忽思母卽馳還母疾顛天祈以身代病果愈人謂孝感巡按扁曰孝行

劉忠甫郡學生性仁孝家貧好學父客靈寶疾死忠甫哭奔仆地啟棺重殮忽雲蓋旋覆不散人謂孝感

趙釗字汝賢宣化里人性誠慤重仁義諳孝友母劉病告天祈以身代病果愈憂兄痴弟瞽養生得所預置棺衾俾殮同於己且輕財樂善郡有古人之稱

楊九齡幼孤純厚仁孝守棺號泣竭力營葬鄉人稱之郡守因號古松作古松歌以贈之內有云仙人服此得長

壽九齡取此號無錯我愛人品能孝行叨牧行歌重爾何

楊崑字文化居永樂鎮嘉靖時人父早逝母崔氏孀居崑奉養無違忽母邁疾湯藥弗進屢瀕於危無計醫療崑焚香告天祈以身代未幾果愈逾年正月同眾赴大和山造南巖極頂捨身酬願溝崖萬丈落身無恙一時各省香客聲孝振山圖形天下上憲聞之給衣巾立坊表有古今來異孝天地間罕人語蒲生范潮詩云萬丈深溝天地鑿一心隱念鬼神知崑感神佑施地八分創建

永濟縣志

卷十二

孝友

八

元帝廟又於鎮左澗設木杠右澗造石橋人從此不病涉焉代猶子償債無德色母卒廬墓三年享壽八十有八萬歷年旌

趙世隆居永樂鎮事繼母以孝聞天啟時人或數年不入城府以教授爲事鄉里多敬之自世隆而外以廬墓稱孝又有李大智李大順楊積猷並己旌

洪尙仁重慶鄉人父蚤世母段守節六十年仁色養惟篤母病晝夜不寐顙天祈以身代俾母多壽庶申苦節母壽九十六卒仁號哭水漿不入口者三日兄四遺姪五

仁撫養完娶給財分產鄉里高其義遇大事輒質之仁力爲和解人皆樂從州守扁其孝行

朱廷珪義平里人世業農性純篤事親以孝稱葬爲廬墓州守陳公建坊表孝行

王旭字士熙性孝友精於詩易叔鳳儀以知塾屋縣論成旭以身代無怨色郡紳謝琚學士曹端相與友善自號鳴樵著詩集

劉東旭字暘谷易本家訓孝纘父風常廬墓督學陳二周公表其事與父忠甫並曾祖母建祠東關烈孝四世三

永濟縣志

卷十三

孝友

九

人

石景先字孝甫八歲母鄭孀居四十年偶病禱以身代誓終身不茹葷母果愈後母卒哀毀幾絕及葬不忍驟封墓負土日三次廬墓三年州守陳公親臨墓側巡撫立坊旌孝復其身

王天民字志尹郡庠生父湖商於甘涼逆歸之未幾父歿號哭擗踊旣葬廬於墓週兩歲以哀毀過度卒州守旌其門搢紳表其墓

李鴻輿韓村里人仁厚方正週歲父歿稍長卽知詢父狀

事母孝讓產殯兄嫂撫姪暨表姪負人債則出四百金
代償州守重其德延賓席

崔明潘侯村人幼出外年三十歸里田產悉爲諸兄有姻
黨有議別分者慨然曰旣爲兄有今復奪之是奪兄產
也卒辭不受別自經理成家立業竟倍諸兄

生員張昌世大竹知縣昌會弟甲申闖逆比餉最爲慘酷
世隨兄入見求以身代賊怒施以極刑毫不介意亡何
兄卒世又代姪受比嗟乎人有一事合義卽死且不朽
世於急難兄弟可謂僅見者矣

永濟縣志

卷十二

孝友

十

李斗星字柄北庠生世居東招賢村事親以孝稱父歿廬
墓三年負土封墳母歿亦然共廬墓六載康熙年 旌
庠生姚廷珍字聘之永樂后鎮人父歿後廬墓哀思雍正
年 旌

生員薛英賢三歲失恃及長父貧而病英賢竭力以致孝
養始終不倦德感鄉里中丞誥旌以菽水承歡提學劉
捐銀完婚州牧龔屢捐米以助之雍正年 旌

崔燦字旭生雍正壬子舉人性孝友父歿喪葬盡禮後值
疾風暴雨必詣墓所如寢膳問視狀終身不懈其弟病

危燦廣延名醫顛天代禱人咸謂精誠所感云

李文廉家極貧乏孝行純篤竭力以奉養宗族皆稱孝矣
傭工以營葬鄰里爲之悲焉乾隆年 旌

候選州同楊生滋仁孝性成竭力奉養至老不倦乾隆年
旌

朱履吉字藹人恩貢生早失怙母病癱侍疾先意承志衣
不解帶者數年及母卒哀毀骨立喪葬如禮

張艾東賢里人自幼失怙常以不及事父爲憾故其事母
也凡力所能者無不竭力母好施而家固不豐則力行

永濟縣志

卷十三

孝友

十一

節儉但有所餘卽周給鄰里之貧乏者以遂母心母憐
甥女早孤則接來撫養以慰母心母痛外祖乏嗣則代
謀以安母心母歿哀毀骨立殯葬盡禮歲時伏臘必至
墓前拜哭孺慕之誠老而彌篤焉同治六年 旌

儒士楊步青節義里人幼承父訓長篤彝倫父歿步青甫
十九歲痛不欲生事母無少違事叔父尤篤訓弟步斗
讀書入邑庠外大父乏嗣奉母命立祠祀之及母歿葬
祭如禮年五十好學不倦著有河濱野人集待梓同治

六年 旌

州同銜王鯤吉城里人幼業儒長隨父賈於外父以業賈致富最重儒臨終囑鯤曰四民以士爲首農次之至於商末道耳教子弟務以讀書力農爲業商非所急也父歿哀毀骨立葬祭如禮恪遵遺言擇子弟之秀者爲之延名師以課讀其樸者使之率亞旅以力耕厥後弟煜及子姪相繼入庠且以日用所餘周親族鄰里之急曰此吾父志也迨年四十以母老罷賈日侍母側先意承志母歿廬墓三年日凡三拜哭聞者莫不下淚同治六年旌

同知銜姬致祥諸馮里人事父母以孝聞及父歿痛不欲生母病羸經年臥床蓐致祥移榻伴母湯藥必親嘗穢汗必親滌及母歿哀毀成疾葬後廬墓側朝夕拜哭越四年餘親友勸之歸至家睹柩捲手澤思親益切疾數月遂卒同治六年旌

附貢生胡體道北陽村人性仁孝父病三年日侍湯藥未嘗少離父歿後事母無少違適已有疾危甚恐母見其危而憂也常止母看視飾言以慰親心及將終流涕而囑諸子曰我所痛心不能瞑目者以有老母耳爾祖母

年高服勞奉養勿可稍懈則我在九泉此心庶幾少安也時年五十三而終子仰廷仰憲事祖母悉遵遺命無少違禮

生員張廣浹譚郭村入幼失怙先意事母惟恐不及壯而游學亦不越二三里尤期朝夕侍養焉母年八旬忽得風癱時廣浹年週花甲鬚髮皓白晝則侍於親旁夜則宿於榻側如是者十年至母歿躡踊號泣哀毀骨立雖年已七旬而哀哀如孺子焉戚族感其孝咸欲爲立石表閭廣浹力辭之卒後梓里念之不忘因榜其門曰孝

永濟縣志

卷十三

孝友

十三

思維則

王文高上官人遷居常凝村幼時卽知孝親及長母失明凡有所事以身代之常爲人傭工以資養或不得已遠出必告母以歸期至期雖風雨不避也其母死日夜痛哭死而復甦者數次以貧不能娶竟絕嗣年八十一而卒鄉里義而葬之

廉廷臣盤底村人素以孝聞父歿葬後廬墓百日享壽六十有九

生員楊炳南南基城人爲人慤實端正事繼母惟謹兢兢

無敢違禮鄉人咸以孝稱又胡寶山金巷口人性循謹亦以孝事繼母云

增生常聚奎潘侯村人週歲失恃祖母撫育成立及祖母年衰出入起居奎不離左右頗得歡心其祖母嘗語人曰有孫若此可以代子後祖母卒喪葬盡禮奎生母劉早逝繼介與趙與陳凡三奎孝之如一陳少奎一歲光緒丁丑大侵奎年七十四負米西河而自食麤糲後以食指繁多不得已與弟兆奎分爨而愛敬如故

王盛孝廉清源曾祖也與兄興式好情篤業農盛子一兄

永濟縣志

卷十三

孝友

十四

子三恐百年後子姪不相睦或析居則田產平分已以一子而得半兄以三子亦得半未免軒輊因請於兄以兄之一子嗣已兄初不允請之再三方許乃囑子姪曰爾等同居固善如萬不得已而分產則田產四股均分其居心亦加人一等矣

任兆麟小李村人幼失怙事母至孝家貧未能卒讀力田養母常持錢置母臥處少則暗爲增益不使母知母偶有憂色卽引可解頤事以慰母心三十年如一日鄉里以孝榜其門

王兆麟太陽村人性孝友業岐黃善決人生死未嘗受謝待親友之貧者亦厚其父積康繼娶常氏性多戾麟善事之後常氏得痼疾麟侍醫藥二年未離左右不惟其父喜悅卽其母亦曰麟子行事實獲我心鄉里榜其門享壽七十有六孫廩生榮綬以辦賑勸墾獎五品銜任自隆陽祖村人性至孝家貧母病危醫者無策自隆暗以刀割臂肉投藥中母服之乃痊及母卒哀毀骨立殯葬盡禮壽八十一而終自隆孫君悌以父有疾亦割臂以奉宗族繪圖以表其事曾孫安合於父歿後百日衣

永濟縣志

卷十三

孝友

十五

不解帶葬廬墓三年一門之中三世稱孝焉

增貢生胡凝道字虛齋北陽村人幼失怙事母以孝聞母患腿病日臥床第躬侍湯藥不離左右者二十餘年母歿喪葬如禮鄉里樹碑以彰之

李來來三家店人幼食貧適母病篤藥餌罔效因祝天曰能祐母愈願削肉以奉祝畢割左臂肉烹以進母病果愈

任天河陽祖村人九歲失怙事母以孝聞及母歿葬後築室墓側朝夕哭拜居半年親族毀其室而強之歸未幾

復築之居三年焉

廩生牛映極小里村人幼失恃事父及繼母以孝聞父歿
讀禮守喪葬後廬墓一年

李子發三家店人事親以孝著及年近五旬父邁疾醫藥
罔效發憂懼無措聞古人有嘗糞而辨病之休咎者發
因嘗至三次享壽七十有三子孫繞膝人以爲孝行之
報

甯宗愚風陵東張村人性謹厚三事繼母無一間言其父
叔鎔再娶卒畱幼女以父垂憐驕恣無度宗愚善撫之

永濟縣志

卷十二

孝友

十六

三娶卒畱幼男乖戾非常卒感悟而勤力稼穡待其父
四娶宗愚事母益謹不特其父安之卽妻子亦不敢歧
視也依依膝下數十年如一日焉

趙大發字仁圃號心如居高翁鎮昆弟二人大發居長性
孝友家貧炊煙時斷每得旨甘必以奉二人親歿後值
忌日必潛然泣下曰祭而豐不如養之薄古語不信然
哉偕弟大才傭工澁池每完已工輒代弟勞鹽估郭五
異之因令督諸工作所得鹽恆倍他人產諸商爭羅致
之不肯往曰主人遇我厚後郭五與他商構訟遣大發

代質平陽太守指以示人曰此人於數十家畦地言之確鑿使聞者了然如數指上螺紋胸中雪亮真奇士也後家稍裕凡族黨戚友推解不吝生平未嘗讀書而遇文士尤加禮焉道光壬辰邑侯莫毅農延鄉賓遵例詳報 恩給九品頂戴享壽八十有五生子五少子歲貢生昌齡尤孝友嗜學

戴邦貴字良庵郝家巷人從九品少失怙惟伯兄邦彥是依事之如父伯兄年近古稀且乏嗣邦貴生子四以長子天眷爲兄嗣兄卒事寡嫂甯氏如兄在焉鄰里有不

平事多方排解不使興訟人以是稱長者享壽八十一今其子孫繁衍書香不斷咸以爲孝友之報云

潘丙戌與弟卯兒堡里人俱業農性孝友事繼母如生母及歿哀毀盡禮家貧偶有甘旨互相推讓嘗策蹇外出兄弟以騎互讓竟均步行後丙戌病篤謂家人曰我死吾弟恐不忍離遂歿十餘日其弟卯兒亦歿

孝友原於天性此編所載於農夫作苦未曾讀書識字之人尤爲詳載事蹟篤倫紀而勵末俗後有觀感興起仁厚風行豈非邑里之光歟

張魁中瑤村人幼失怙惟母命是從年十六卽應家務閱父遺簿其貧乏不能償者券悉焚焉遇歲荒周恤鄉里毫無德色某有女貧不能養魁卽優爲貲助生平仗義多類此

劉根性字敏翁居前北曲村性友愛髫齡失怙恃有弟正性甫四歲撫之成人妻姚氏善體夫志待弟尤篤正性嘗語人曰兄嫂之恩直同椿萱迄今數世同居鄉里賢之

庠生黃鏞字鳴郭性孝友弱冠喪父殯葬如禮弟錕尙幼

教之讀書成立事母孟氏色養尤篤因家用不足肄業書院李筱湘府尊暨馬玉山縣尊均鑑賞之每課輒屈其曹令赴秋闈以母老不忍遠去及母歿水漿不入口者數日每念二親必淚涔涔下教授生徒數十年多所成就所得脩脯悉付之弟居鄉忠厚待人不較錙銖共推爲長者卒年六十八歲

文學

柳沖楚賢子少好學多所研綜景龍中以左散騎常侍修國史初太宗命諸儒撰氏族志其後門胄興替不常沖請更修詔與魏元忠吳兢等共取功德時望貴籍之家等而次之至先天中復詔沖與魏知古劉子元等討綴書乃成號姓系錄遷太子賓客昭文館學士以老致仕盧綸初避安史之亂去客鄱陽代宗時數舉進士不得元載薦其文授闕鄉尉遷檢校戶部郎中韋渠牟表其才召見禁中異日上問盧綸李益何在答曰綸從渾瑊在

河中卽召之會綸已卒後憲宗詔中書舍人張仲孫訪集其遺文文宗尤愛其詩問宰相綸文章幾何亦有子否宰相對綸四子皆擢進士在臺閣上遣中人往其家索得詩五百篇以聞

耿漳寶應元年進士官右拾遺工爲詩方代宗時劉長卿錢起並以詩名天下時謂之錢劉而漳與起及吉中孚韓翃苗發司空曙崔峒盧綸夏侯審李端皆齊名世稱大厯十才子

楊巨源貞元中舉進士第初爲太常博士禮部員外郎出

爲鳳翔少尹召拜國子司業年七十致仕巨源以能詩
訓後進多成其藝文宗太和中時宰以巨源文儒之長
宜見優朝廷乃白以爲河中少尹不領職務而歲給之
祿終其身

張涉家世儒者初官國子博士能爲文嘗請有司日試萬
言時以張萬言呼之德宗爲太子受經於涉及卽位之
夕召入宮訪以政事翌日詔居翰林恩禮甚厚遷散騎
常侍後歸田里卒

薛逢會昌中進士初在崔鉉幕府及鉉相引爲萬年尉歷

永濟縣志

卷十二

文學

二十

御史尚書郎持論耿切高自標顯有薦逢才宜知制誥
者時相不可乃出爲巴州刺史後以太常少卿召還遷
給事中秘書監卒有集十卷傳於世

聶夷中咸通中進士官華陰尉詩集一卷夷中所作多傷
憫時世意主諷喻其憫農一篇尤懇惻五代時馮道常
誦其詩爲求治者告焉與夷中同時河中王駕亦以詩
稱於晚唐駕舉進士官禮部員外有守素先生集六卷
其自號也

盧知猷綸之孫簡能子也中進士宏詞科補祕書正字荆

南掌書記遷右補闕出刺饒州以政最遷中書舍人避
朱玟之難不出僖宗召拜工部侍郎史館修撰累太常
卿戶部尚書太子太師值劉季述之難感憤卒知猷文
辭瞻麗尤工於書楷法精妙而器量渾厚世推爲長者
自唐中世至五代河中世名家者稱盧氏
薛紹彭以名家子能詩工書宋元祐中與蘇軾黃庭堅遊
同時簡州劉涇巨濟亦有名紹彭與交而尤善米芾與
芾以書畫稱相知芾常賦詩稱米薛劉或又言劉米薛
紹彭書傳於南渡高宗亦珍之

李獻能其先世有爲金吾將軍者時號金吾李家獻能與
其從兄弟三人並登進士故李氏有四桂堂獻能博覽
工詩於文章尤長四六金貞祐三年廷試第一人宏詞
優等官翰林應奉文字爲趙秉文李純甫所稱後十年
出爲鄜州觀察判官復爲應奉遷修撰正大末以鎮南
節度使充河中帥府經歷官元兵破河中獻能奔陝州
與河解元帥趙偉有郟天興二年十一月偉帥兵入陝
州城殺其行省獻能亦被害

王佐元末隨父官南雄因亂不能歸遂寓南海與粵東孫

蕢等結社賦詩何真據廣州召掌書記佐與蕢及趙介
李德黃哲並爲真所禮稱五先生及真歸明太祖佐乃
還鄉里洪武六年徵爲給事中太祖賜宋濂馬命侍臣
和御製歌佐立成獻後乞骸骨歸

楊世芳尚書博曾孫也萬厯己未進士由庶吉士累官學
士世芳少絕穎讀書能一目數行下爲文章甚敏他及
琴書諸藝並能通之天啟中爲魏忠賢所惡奪官及莊
烈帝時復召爲學士

郭廷佐字良輔號潛庵少好學性嗜吟詠與郡中搢紳先

生約爲詩社諸郡守聞其賢延以爲賓三請而後至與
論詩甚歡益禮廷佐廷佐亦不以州民輕爲守屈也郡
守少洲馮公贈以詩云鶴髮蕭蕭倒角巾林宗雅望絕
時倫我來空負溪山約不向仙舟訪隱淪時傳爲雅談
吳雯先本關東人其父來爲蒲 廣文因畱家焉故雯爲
蒲州人雯居永樂唐時置縣處也得李商隱遺僑之地
而卜舍焉其間有玉澗水因李號玉溪生故雯亦自號
玉澗子康熙戊午舉博學宏詞遊京師與四方能文章
知名者接山東王尚書士正尤極推揚之晚年築室谷

口家雖日貧而讀書不休其生平篇什甚富人爲刻焉
劉淮復安里人性剛直心正大淑身以敬取法程氏之規
處家以嚴遵用文公之禮累請鄉飲

韓墳興禮坊人字宜生號玉暉官生閣學爨子博涉羣書
精工文辭生平以詩酒自適嬾於仕進雖值鼎盛而甘
心澹泊毫無翩翩公子態有集唐詩百餘首行於世
張廷輔字君相性敏異博覽羣書有逸才每賦詩爲文有
柳子厚之風補州學生歷科不第遂隱居讀書從遊者
甚眾所著有西津集

舊志論曰儒林文苑前史分之爲二以長各有所專而
事則異矣邑之儒林見在前世者蓋少旣以附著人物
自柳沖以下至於王佐每爲談議者所稱故次列焉夫
文章一技於道未尊少陵言之雖然彼其雕篇織思蘊
綺含華韻夏宮商聲出金石雲霞奪其麗珠璧揚其英
作之一朝足傳千載誠亦不朽夫豈尋常竊弄硯墨未
足成乎語言者所得分其名而假才芬以相冒哉

續文學

崔宗泗康熙甲午亞元未赴春闈卽卒與邑進士張銷齊

名幼就塾師讀臨晉翰林謝陳常見所爲文大器之遂
從學焉品行狷介爲文刻摯著有薪杏文彙行世與族
弟秉禮姪紀一時稱三絕焉

吉萬邦字咸甯號若庵岳村人補州增生善楷書所著有
如是齋若庵集詩經集言客窗日問

吉懷字坦如號借園一號謙六岳村人性仁孝工書能文
尤長於詩古所著有謙六集借園詩集十卷文四卷以
增廣生舉鄉飲介賓

姚飛鵬字圖南歲貢生世居北節義村係唐孝子姚棲雲

永濟縣志

卷十二

文學

二十四

宋義士姚登明之後也每導迪親族曰吾宗自唐宋以
來世稱孝義門閭凡我後人宜善繼述慎毋遏佚前人
光博學工詩著有愛敬堂詩四卷年九十卒

侯百祜字受天乾隆時歲貢大同懷仁縣訓導教授生徒
多所成就去懷仁時縣尹萬公率同寅暨諸生送至城
外數里揮淚不忍別並贈以存心正直四字因書而懸
諸其堂今猶存

崔作霖字雨三歲貢生端嚴博洽所讀書必經手鈔設教
梓里以身示則生徒敬畏之登賢書及入庠食餼者不

勝數歿後爲樹教思碑

陳灼見字俊三世居焦廬里讀書穎悟入庠後九赴棘闈屢薦未售道光己亥貢成均設教首陽山二十餘年多所成就著姑存草文集兩卷及門遊庠食餼者百餘人爲樹德教碑歿後以門高通德榜其閭

常秉謙字六吉居田上村生員自省之季子也自省居家恤孤濟貧素有善人之號秉謙恪守家範博覽古今尤精左氏春秋年十九卽食餼於庠鄉試累薦不售遂無心仕進構思敬軒杜門教授多所成就著有春秋總論

永濟縣志

卷十三

文學

二十五

崔曾晉字錫蕃道光乙酉拔貢授祁縣教諭孝友嗜學經史外又通卜筮以目疾致仕還家失明猶日使其子若孫執卷誦聽數十年不輟邑中士咸稱博學焉著有詠物詩草待梓

甯煥章字仲晦道光時人少穎悟讀書過目成誦老愈嗜學性甘澹泊每述先世窮約時事輒戒家人曰願汝曹恪守淡素風勿忘先世家範後從朝邑李春元遊學問愈有根柢前蒲州府李公慶翱器重之李公防河輒與談兵許爲巨材著有首陽山人集禮記集註周易附錄

等韻正誤四書日鈔左氏兵法論要兵法要訣子悅武
進士官山陰都司

馬衢亨字上占號鑑吾道光甲午舉人以勸捐保舉加光
祿寺署正銜侯選儒學復設教諭幼聰敏熟於經史尤
嫻詩詞雜體兼精岐黃術活人無算主講華州書院生
徒多登賢書生平教授梓里入庠食餼者甚多歿後門
人豎教思碑

崔坊字表臣咸豐時 恩貢性拘謹有古人風鄉里不肖
者皆憚之秋闈試十二次九薦而不獲售遂淡於功名

永濟縣志

卷十二

文學

二十六

恣意爲詩歌著有梨花館遺草兔園駢枝待梓爲人清
靜恆數月不出其齋以是村人罕見之事母至孝年已
五十猶受其母斥責無難色每以勿克承志爲憾晚號
兔園野叟

樊紹閔字孝先號馨邨武庠生工詩著有嘔血集善墨竹
彷彿鄭板橋筆意名重京師少游於秦獲利萬金不營
產業悉以周貧乏喜讀書敬文士遇才氣可造者助以
脩脯俾從名師陝甘宿儒名士盡訂知音岐山羅石才
孝廉贈詩云匣中寶劍動星紋迹混風塵自不羣畫筆

有神詩有骨襟懷如月氣如雲多年物色偏憐我三輔
人豪半識君食肉封侯甯有種他年重見李將軍其見
重於時如此詩稿散佚其子忠勝鈔存數篇附錄於後
題雙柏齋云一雙黛色出凡塵滿院秋煙五丈深自古
大材難用世天生爲伴讀書人 題魯橋云柳外桃花
竹裏樓雲山北面水東流眼前好似江南景只少漁人
弄釣舟 題畫竹六言云何須十日五日隨意三竿兩
竿看去煙雲如許知君家在王官

吏治

薛魯建文己卯舉人官給事中嘗三奉使往占城交趾儀
觀雄偉議論慷慨後卒於交趾敕使迎其喪歸葬

張福永樂庚子舉人任山東平度州知州律已廉介鋤強
扶弱時稱循吏擢大名知府卒於官平度民立祠報功
春秋祀之

衛述景泰庚午舉人知山東武定州剛直清敏拊循孤弱
倍極仁慈移知莒州毀淫祠興學校在官十年既去民
咸思之孟琳者與述同年官淮安同知政聲甚著初以

永濟縣志

卷十三

吏治

二十八

舉人至京師時石亨曹吉祥方持權欲致琳門下堅謝
不往而與琳同州謝廷桂者景泰癸酉解元同知常州
府治行稱江左第一終河間府知府

史魯正德戊辰進士初任鎮江推官爲政嚴明平反冤獄
有懷金來餽者峻卻不受貴官某以書來爲人干請裂
而還之推刑科給事中屢上章劾大臣與守備中官之
失并論甯王宸濠奸狀時議偉之後爲錢甯所忌罷歸
姒昂正德己卯舉人嘗三爲縣令兩任通守所至有循良
風其初任陝西韓城也吏胥多貪冒索錢昂嚴其約束

凡民有訟者絕去賂請里甲飼馬外別無供億也其治績陝西志亦載之

景佐宏治庚戌進士任東安知縣有惠政遷都察院經歷以事忤劉瑾下錦衣獄旋得釋累遷至河南參政佐性嚴重所至能執法及罷官歸足未嘗一造縣庭也

羅鳳翱嘉靖丙午舉人自國子博士厯官至甯夏巡撫鳳翱爲政不嚴而威其在甯夏設防禦綏士民西邊賴以安堵者十年

王謙嘉靖甲子舉人繼登進士官工部郎出知杭州權事

永濟縣志

卷十三

吏治

二十九

時浙兵以乏餉大譁巡撫不能馭因走匿眾益洶洶謙知狀卽身前諭之爲開曉利害曰汝無訐吾當發權金代與汝餉眾乃定杭人尤德之

孟希孔琳之孫也萬厯辛丑進士知扶風縣初下車屏去文法曲爲綏輯招撫流亡予以牛種緩其摧科不輕鞭扑民感其德後卒於官縣人爲具殮焉初琳子汝濬官知府汝紀官通判至希孔三世並以清白吏稱

崔志乾前明崇禎己卯舉人順治初年爲順天保定二府司理時盜賊充斥往往白晝劫奪志乾上緝盜之策於

中丞願假三百兵掃除此輩中丞有難色強而後可因先檄行州縣各備馬匹草料志乾率兵巡緝擒獲無算賊望之曰崔爺爺來矣卽遁去不數日而凱旋賊由是息至今擒賊感恩碑猶豎司理廨外

崔偉觀字扶青康熙壬午舉人授阜平縣知縣阜平瘠窮視布如綺偉觀取能織紡者獎以五色布而邑之女紅始盛士人又不知學其討習皆免園冊中物偉觀心焉傷之捐俸立書院取諸生之能文者爲之師不二年文風大振後調署武強卒於任

永濟縣志

卷十三

吏治

三十

崔繹字思敷雍正乙卯舉人以明通授聞喜縣教諭後改渾源州學正以薦揀發福建知縣歷任福清泰甯南靖龍溪遷福州府海防同知再遷廣東肇慶府知府致仕歸署福清泰甯時福地濱海多劇盜民不獲安繹爲嚴緝重治教民編保甲守望相助邑遂無盜泰甯富人或殺人以賄買貧民代償繹必正其罪南靖有二水環城而南復合爲一每衝突爲居民害繹爲築隄民賴其利比之蘇公隄云

崔田見字二占一名雙蘭陝西湖北巡撫紀子也乾隆乙

酉科拔貢考取八旗教習報滿以知縣用分發廣東署
始興補鶴山再調澄海鶴山庫有間款上官欲吞取之
不聽召紳耆使領修隄堰至今賴之任澄海時嘗肩輿
赴鄉過已故進士某之門從役曰此因盜案繫獄李亞
宛之祖宅也田見駭疑間恍惚似有公服跪泣輿前者
遂再三研詰亞宛尚有可生之路力請上官活之亞宛
在獄中亦夢其祖謂之曰官活汝矣後羣囚欲逃獄亞
宛洩其謀得不逸潘李兩族械鬪李不勝告潘謀反撫
軍據情人奏委員會訊田見獨力辨其枉不能得竟赤
其族從此自謂徑直不能諧俗遂引疾去

裴福德字星甫幼失怙恃家貧廢讀服賈山東者廿餘載
值髮逆犯東昌高唐等處德貝子僧王帥師督勦遂投
効糧臺及李逆平保同知賞五品頂翎旋遵例報捐知
縣咸豐六年選直隸容城縣地瘠民刁在任十年聽斷
緝捕催科著有循聲其間歲旱福德禱不應憂勞成病
引退養疴省垣時梟匪寇大名威縣等處失守遂竄擾
冀州屬南宮告急公奉檄復出至則賊已將圍城居民
欲遁公諭以大義並出示母得妄動卽遣人迎春屬衝

圍入城民心稍安城遂得全加運同銜並換花翎調署
南和縣縣屬邊邑民頑悍好鬪錢糧疲滯聚眾鬩堂習
以爲常城郭傾圮不能修葺福德至以猛治之民多怨
讟三年民乃大和事事修舉次年二月回任以前任王
令交代內解款被議至今畱寓畿輔

義行

王三鑑估於天津有鄉人以百金寄一夕暴死其子不知也後二年三鑑歸里出其金還之封識宛然迄今鄉里猶稱道不忘

王崇雅尙書崇古兄也嘉靖中蒲州地大震朝臣奉命來賑災者爲崇雅父同年進士欲以州中丁絕地予崇雅爲資崇雅悽然曰蒲人不幸被茲慘傷雅徼天幸尙忍取非已有乎且絕丁多寄淺土髑骼不掩盍訪其親戚取貲以爲葬資公仁及枯骨矣其人歎服崇雅舉進士

永濟縣志

卷十三

義行

三十三

官至太僕卿

張甲徵萬曆壬午舉人繼登進士有同年子漂泊無歸甲徵召至其家延師教使讀書而以五百金爲償所負同年子感激力學後舉鄉科曰成我之德終身不敢忘

楊惠芳侍郎俊民孫崇禎丁丑進士以工部郎家居甲申春李自成下蒲州其僞防禦吳養德等擒惠芳逼使仕賊惠芳不肯從乃止

薛毅少爲諸生性端謹敦內行其弟當暑月死毅晝夜守其屍哭不去後母喪哀毀哭泣三年不出戶久致疔瘡

前後州牧聞毅賢將以孝行方正舉之皆力辭中雍正
丁未進士任蠡縣令以父憂歸服闋補官得貴州之龍
里龍里皆蠻夷地遠且惡大冢宰欲爲之地使改授毅
謝曰龍里雖險遠毅自得之且必以其惡而避焉規獲
善所誰處其惡者乎聞者高其義赴官六月而卒
韓瓚孝友敦睦有張姓者負人金責償甚厲不能還因遁
去瓚憫其窮爲如數償之張不知也有何氏者負瓚逋
至八百金終莫能歸瓚召其人與飲卽取券焚之

吉萬方字右咸號協和四歲失怙母病萬方禱北斗願以

永濟縣志

卷十二

義行

三十四

身代已而母愈有二兄已析居事之甚恭萬方爲人尙
義好調人急里中有長不能娶者親死不能葬者皆資
給之常於凶歲買饑人二女爲婢後一年歲熟卽召其
父還之不取值焉補州庠生

崔志哲素有善行順治己丑之變賊遣僞吏至蒲州責餉
志哲有弟久析居弟死姪幼以當輸餉被縛去志哲知
之奔追及隸曰彼少不省事餉宜問我因解姪使去而
取索自繫縣中聽僞吏所爲會國兵討賊者至僞吏宵
遁志哲得免

楊作楫貢士也生平好行善鄉里窮困者多方恤之有衣食其家至老死者魏如唐者生女以貧不能養將棄之作楫爲之乳育於家至五歲召如唐歸之

馮祥字文禎張華里人性剛直輕財重義酷不喜佛老每遇其徒必斥之曰爾獨不爲儒爲農何辟兄離母廢君臣父子天倫如是耶時因其說亦有改邪就正者冠昏喪祭一遵文公家禮鄉人效之學士河汾薛公贈以詩曰忽從囂雜見眞淳誰道今人不古人四禮每宗朱氏教一門常接孟家鄰春庭時雨年年潤蘭砌光風日日

永濟縣志

卷十二

義行

三十五

新青簡會須書行義高名直與董生親觀此可以知其
人矣

楊謚從學薛文清公之門眞知力行洛陽閻禹錫見而奇之曰薛門有人矣隱居不仕子選輕財重義散粟賑貧
遇暴骨必掩瘞

王輔重慶鄉人仁孝樂施家豐財凡族戚乏者輒周之歲
三饑三煮粥以賑所活甚眾

王佐號樸實頌之子性孝友善繼述父子賈三原輕財重
義尚書端裕毛公嘉其人朝夕招與語太守王公屢請

鄉賓

趙亨儀度清癯性質純雅事親以孝治家以儉幼涉詩書
長業商赴河東運司有失金百餘者亨卽還償眾德之
郡牧聞其賢以扁旌其門

尚鶴風陵鄉人素豐財出粟備賑親有窘者濟之施資修
寶玉峰修河東驛館州守趙公嘉其疎財仗義延爲鄉
賓

王岡字至厚博學孝友仗義疎財凶歲儉用周貧族里婚
喪傾囊資助知府張公表其墓

永濟縣志

卷十二

義行

三十六

孫鎮字景澤兄弟友愛不求分異居杭有婦失金將投江
問得其故濟之金居涼時疫買藥療治里人李伸死不
能葬爲具棺殮州守聞其賢延賓席

王榮文中子裔事親以孝睦族以仁貧死無棺者爲助葬
兄弟欲析者爲勸止州守聞其賢延爲上賓

陳江字大湖崇禮敦信人所敬憚事親孝敬兄撫姪始終
無間郡有負數百金而曖昧者慨然析券池陽被火客
以金來寄火熄客忘其人尋訪而還之州守請鄉賓屢
辭不赴按院表其門累贈戶部郎中

古人行義達道一節之善本出無心非有要名之念也而名亦永久不泯世風不古習俗日趨於涼薄嘗有貨利縈心銖積寸累居然素封而貪吝性成凡遇濟人利物之舉力所能爲反退縮不前刻薄成家理無久享此編所取如出粟施錢惠及鄉里族鄰其數雖至少必詳書之不以俚瑣爲嫌而過文其詞用意蓋有在也

王旦姚温里人孝友慷慨繼母逼之入井出無憾仍厚撫其弟運漕者失糧出數百金爲易粟眾得逭罪出八百

永濟縣志

卷十二

義行

三十七

金修郡城建頤真園以娛老卽巢雲阿也至今傳爲中條第一佳境

劉榮貿易三原於逆旅拾金知爲蒲客醉遺持歸正值寄金與受金者相訟卽以原金付之州守義其事

賈宗仁字體元絃誦廂人蚤號青碧春涉大江見汪洋活潑心賞之遂號春江德性恬淡剛正清潔孝友重於鄉閭初以援例爲巡宰棄職歸閉扉簡出讀史傳評騭出人意表生平無二媵他遇與人交惟以德義相期許年登九袞丹顏鶴髮怡然神仙郡大夫高其齒德延爲鄉

賓辭不就常出遊江湖間十餘年積貲千金他日客江
有同旅趙某者藏二十金於笥而忘之疑爲逆旅主人
婦所竊索之甚急其夫不能明卽欲自殺宗仁諭止之
而出己金代之償主人夫婦得全以子芳贈戶部郎中
大學士韓爌銘其墓曰猗與賈公稱耆英倫彝克迪施
濟宏南窗永日無紛營品題月旦高榮名詳見理學張
去浮墓表祀鄉賢

崔縱武潘侯村人秉性剛毅居心忠厚然諾不欺施舍無
吝村莊溝渠環繞水浸溝崩代受其患村人欲鑿池畜

永濟縣志

卷十二

義行

三十八

水苦無首倡時縱武家貧慨然出貲數金身督工作忠
誠不怠至今村民賴其利享年九十四 恩賜米絹兩
次德齒兼隆蓋吉祥壽考人也

許作賓南湖村人賈哈塔鎮以織麻爲生東主宋某因賭
債潛逃賭者向作賓強討卽以應得辛金代償閱數年
獲利倍豐宋某感甚欲分半業酬之辭不受惟取辛金
而已作賓子友恭賈興化鎮適客攜錢十緡寄之屬異
日來取去後訖無音耗子孫世守百有餘年今錢猶存
焉世人每貪意外之財若許氏父子可以風矣

崔景僖字桂五廩貢生贈祁縣教諭潘侯向與堡里等村爲一里顧其地中限鴻溝祁寒暑雨吏民苦之道光九年請區爲里南里北潘侯下里等村屬里北堡里屬里南遇課期各設糧棚十日葺事請縣官定爲四月初八十月初八進城封納從此吏無追呼縣令旌賞鄉人亦樹碑以頌其德

張得時字興齋譚郭村人少孤事母至孝及長遇事敢言有爭訟數年不決者一經解說罔不息止邑侯曾表爲鄉正其居近二賢祠祠東有路隘且長爲東鄉赴城之

要途凡負擔者經此咬牙致力乃得出焉因名咬牙衢衢得時深爲慮因相其地北倚堰不可動南倚牆屬鄭姓遂出貲買地以廣其路往來者至今稱便焉

陳國清字湛然生平好善樂施乾隆十四年於五老峰峪中創建茶房以便行人時旱水缺工將中止國清憂之成疾忽夜半聲如雷莫辨其故次早視之有清泉一道流至茶房門首因流窮源行不數武東南山角忽開一眼大如拳水湧出工於是乎竣人駭爲神泉至今稱便嘉慶三年饑永臨交界處聚饑民千餘將行不軌國清

單身入其中解說使散請於知府額公璘佈會知縣孟公傅輝散賑邑賴以安又於本村廟中設粥廠以食鄰村之饑者七月乃止由是額公暨孟公保舉六品頂戴謝雯世居太莊里薛家厓同知銜生平樂善好施時河東書院脩金膏火惟藉捐廉請以所置北文學村房地捐入書院以資助上憲許之俾勒石以垂永久計地共一頃一十五畝八分零房院二所共一十五間場院一處招佃耕種每年每畝依倉斗夏租麥一斗五升秋租穀一斗五升共得三十四石七斗四升八合今猶賴焉

王桂元字林一邑庠生鄉飲介賓有親某負已債極多父世芳憐其貧給銀令設油店生理某盡吞使歇其業病彌留屬云所歎分毫未歸洎某子商鹺漸富慮舊難償愆憑乃父捏言已清設筵邀村耆融說銷帳委無一知者亦不與辨帳盡面焚後親某臨没召元至暗扯手被中與銀一錠長吁而瞑乃藏銀褥邊張皇殯殮及畢已不知爲誰攜矣亦置不問

監生胡慷字豁然北陽村人幼貧勤苦自立一日出遊路遇王李二人王負行李李隨之行數武慷止步旋返將

近村忽拾銀五十兩知爲前二人所遺卽返追之及至果以失銀爭論慷責王曰銀實爾失尙推諉乎王曰何以知之曰我於某處拾之也王跪而請慷卽取而還之後王備厚禮致謝慷不受再三懇始擇其輕者受之其生平仗義多類此慷年四十無子閱數載連生二子今裔繁衍入邑庠者接踵而且六世同居皆慷積德所致也享壽八十有四

耆賓王順天世居風陵鄉西太陽村人秉性直爽行多仗義兼精醫術活人無算未嘗受謝歲饑屢以儲糧散給

永濟縣志

卷十三

義行

四十一

村眾後因族中寒苦並將已地數畝施墳爲祭田享壽八十有四

耆賓陳文成下趙柏人性好施每歲終徧訪鄉鄰有粟米不足者卽周恤之不索償享壽七十有五

常可造素好讀書禮重文士教子姪必擇嚴師忠敬備至值師盛怒引咎婉勸或至屈膝師色霽而後已後子姪以易師請卽呵責曰以先生之屢辱余乎先生課汝曹讀書教汝成人受惠大矣余固樂此何辱爲猶子聚奎炳奎一優增生一歲貢生從孫景林道光甲辰中副車

皆爲邑名士又有常天和者師有疾在館雨中爲之采藥請醫調治數十日事無少懈後孫宗敏亦有聲譽序就訓導職晚近風俗日偷富人喜趨承寒士多囁嚅師道不立職是故耳舉此二人可爲延師者勸

崔景洙字實君嘉慶丙子舉人官應州學正時有生員與人爭訟自知理屈懷金來謁求於州牧爲關說力拒不納主講蒲陽書院五年多所成就一族人遇歲饑餬口無資已鬻子矣景洙聞之卽典衣贖回同時崔廷若於近族鬻子者亦爲贖回以農而知敦本收族不無關繫

永濟縣志

卷十三

義行

四十二

於世道焉

生員李維楹常里村人好善樂義道光丙午歲饑取家中積糧散村眾設教梓里未嘗受謝遂舉介賓卒後門弟子同立德教碑頌之

景繼堯張仙里人家道殷實嘉慶十年歲歉村中貧戶甚多繼堯出銀七百餘兩將合里正糧代完里人感之以積德好義表其門又於五老峰敬祥會馮畱村等處建設茶房以便行人憩息享壽八十歲

周大受東堯村人家素裕道光二十六年歲饑官集富戶

勸捐備賑大受卽捐粟千石以爲眾倡全活無算
尙經信盤底村人幼貧壯以業農漸裕道光二十六年歲
歉捐粟三十石以賑梓里咸豐九年歲歉復捐粟三十
餘石賑之眾榜以德惠可嘉享壽七十有五臨終屬其
子文登曰積財不如積德文登恪守遺言光緒三四年
大禊除捐賑外周鄰里凡八次共出粟百餘石戚友寄
食者五六十人遇有餓斃者卽以蘆蓆掩埋之鄰里感
其德復以治比其鄰旌之

庠生史嘉猷家素裕道光丙午歲歉捐粟賑饑光緒丁丑

永濟縣志

卷十二

義行

四十三

大禊其姪夢筆捐四百金助賑外而於梓里尤周恤焉
全活無算

監生張華性好施道光甲辰募金創建風陵渡會館嚴整
渡規以便行旅咸豐甲寅族叔協榮父子三人自陝歸
一貧如洗華與之處且授之田老者生養死葬少者爲
之婚娶其他義行多類此享壽七十有四

屈秉經高市人家素裕道光二十六年咸豐十年光緒三
四年歲禊每捐粟數十石錢數十千賑濟貧乏人稱積
善之家

高維檀高維極高一元高鶴年窰頭村人家俱富好善樂
施道光二十六年歲饑共捐錢二百餘千賑濟村人賴
以存活甚眾是年南陶城監生尋丕成亦捐錢四十餘
千賑村人迄今鄉里稱道焉

從九品任士宏字永興幼貧嗣長賈於絳州家漸裕輕財
好施道光二十六年歲饑捐粟四十餘石賑恤鄉里咸
豐九年子例貢全盛復捐粟五十餘石且有志文教在
絳州設立東雍書院倡捐千金光緒三四年連歉孫附
貢知恩又捐粟六十餘石且出千餘金以助賑全活無

永濟縣志

卷十二

義行

四十四

算易稱積善之家任氏其庶幾乎

謝盛上店頭人有馮營里胡某爲糧長收數家之糧銀入
城完納日暮借寓於其家翌辰去遺糧銀一封約二十
餘兩而胡某不知也盛追還之毫無德色胡某以匾頌
之

監生謝廷雲上店頭人子三孫十五世同居家裕好施道
光二十六年歲饑捐粟二十餘石賑鄰里而於親友尤
加厚焉咸豐九年歲歉長子純亦捐粟三十餘石恤村
眾鄉里感之表其門曰分惠賙鄰

附貢生蘇啟魁桑林村人家殷實名重鄉里道光丁未大饑出粟散賑附近六七村每月一次每人斗餘合里德之奉匾額曰惠風流芳

蘇君友古縣村人業農在村開設粟店有賈人還家遺金店內君友不動原封失金者至家始知而不悟其處後向君友店中來君友曰吾固知爾必來也遂笑而還之賈人願分金以酬固辭不受

薛承哲上原頭人家素貧一日忽於村外拾布袋數條內有元銀外縛以繩攜歸以示村人曰吾於某處拾銀有

永濟縣志

卷十二

義行

四十五

尋者使到吾家未幾失物者果至承哲問曰袋幾條中有何物失物者答如其言卽如數歸之失物者欲分半以謝辭不受

趙昌齡字鶴年歲貢生世居高翁鎮昆弟五人昌齡其季也性簡默以父艱苦備嘗從師受讀夜盡五更始少休生平廉儉自守惟祭祀燕客務求豐潔事諸兄盡禮嚴訓子姪以品行爲先凡遊於門者率皆恪守矩矱有貧不能讀者輒解囊以助而於親戚尤篤焉道光時司課河東書院齋長瑞府尊命監修院舍院井旱竭恐諸生

不能安倡捐竣功士子以敬業樂羣匾頌之後因親老旋里侍疾之餘檢閱醫書遂精岐黃隱條陰八峰寨與河南馬錫蕃先生友善錫蕃卒昌齡代理遺貲營葬事並爲置祭田於寨下當時賢之

吉梅山字庾卿號岳南子早歲失怙事繼母張盡孝性豁達寬厚慎取與無書不讀而淡於名祿以增廣生舉鄉飲介賓無疾而卒
監生戴學仁家素裕好善樂施道光丁未歲歉傾困以賑村人按戶均發全活甚眾

九品銜常可善潘侯村人性仁孝每遇歲歉卽捐粟賑村中幼失怙恃伯父母撫育成立可善事之不啻所生伯欲爲納監辭之曰納監需費何如將此項延師教子姪讀書以光門第伯從之後子姪暨孫輩書香相繼人皆稱讀書之報云

理問銜張武城以服賈致富慷慨好施捐賑數次不書姓名不邀獎敘有貧而鬻子女者出金止之有歉債而歸地者種數年計所獲可償原本仍以地契歸其人不索值享壽八十有餘鄉人爲樹德行碑

許如泗字敏齋邑庠生性耿介居鄉遇有不平一經排解罔不帖服有某懷金昏夜叩門言兄分產不均將興訟乞爲關說詰所爲僅百緡耳卽謂之曰爾以五十金付我何若讓兄百緡汝仍不失五十之數也况兄弟情同手足於義不可乎某慚而去兄弟式好如故此一事足以風矣

崔懷讓性純篤家小康凡戚族無力婚葬者輒解囊以助每歲暮詢里中貧乏者周之性好讀書事師以誠生子三長次俱以童子冠軍入邑庠孫七列鬻宮者二享壽

永濟縣志

卷十三

義行

四十七

八旬有餘卒之日鄉閭無不感泣至今猶稱道焉

姚鐸永樂鎮人持已以正教學以嚴品行端方取舍不苟以增廣生舉鄉飲介賓

歲貢生刁經邦性簡默嗜學教授生徒有貧不能讀者不惟不索束脩且代供學費故成就寒士甚多同治元年逆回犯陝大荔生員趙思孟攜眷避難主其家經邦解衣推食款待甚周踰年思孟歸闔家戴德以門榜旌之光緒三四年大侵經邦一家相繼歿僅遺一子庚辰甫十歲無所依思孟聞之卽引歸撫育且教之讀後爲娶

婦亦食於其家時人兩賢之

趙增慶堡里人性好義村西北里許有溝深數丈兩厓壁立爲數村往來必由之徑而遇雨卽難行走增慶於兩厓之中獨力鑿成兩窰南北各一行人往來遇雨可避且恃以無恐其他壞道輒修多類此

奎文閣典籍劉恻性嗜讀書積學未售好善樂施親族鄰里有貧乏者時周恤之性至孝及老失明每遇先人祭祀必躬親拜跪行禮邑侯阮公以齒德兼優旌之享壽七十有七

增生張觀海中窰村人家素貧食指頗繁每歲濟以硯田之獲僅能再食而廉介自持光緒三年設帳於王范村家人因旱荒析居遂攜妻子居館所未幾妻病卒遺二子二女俱幼四年荒愈甚失館益窘致二子一女俱餓死自度萬無生理尙遺一女急擇良家子字之遂雉經而死

秦魁炎上陽村人少壯業商而喜讀小學嘗於村東購麻谷廢寺創立書院名曰歸儒芮城薛仁齋先生主講一時請業者踵至平定李菊圃編修用清爲之記竹珊觀

察升泰題書院額並與山西學使麇伯謝公爲作楹聯
玉山馬公丕瑤書學近知非門額以獎之

劉向楠幼業農繼以業商致富卽於村中設義學貧家子弟多成就光緒三四年歲歉捐粟數十石賑村人至本族之貧者各給銀兩使謀生理賴以全活是年堡里張吉久亦捐金數百以賑村人

焦錫祿家貧嘗傭力以助不給勤儉積累後家稍裕好善樂施凡廟宇道路有傾圮者必出資而倡修聞人有窮急卽往周之享壽七旬有餘鄉人以門榜表其義云

例貢張映極業儒未成棄而業商因以致富好善樂施凡遇戚族貧乏者罔不周恤又修下馬頭禹王廟始終其事勤勞不倦享壽七十有七

武生劉占雄字子英性慷慨遇宗族戚友無力婚葬者有求悉助未嘗責償捐祭田數十畝爲祭祀經費有河南鐵工某死無積貲占雄具衣棺葬鄉里美焉

胡天章幼失怙孝事孀母家貧業商赴興化鎮有張某病卒旅舍伴侶無策天章適與同居爲買衣冠營殮後經韓侯嶺徒步隘道面迎策蹇來者避未及俱觸墜溝中

其驢已弊其僕勒賠驢價行道者不忿咸怒責之天章
曰身落數仞幸得無恙天之佑我多矣遂償錢七緡而
去生平仗義疎財大率類此

監生譚若江精岐黃術活人甚眾繼先業生理潼關遭回
亂投河者眾捐貲助救生船拯活光緒三年出粟賑饑
鄉人以任恤流芳榜其門

從九品楊耀林南基城人孝母敬兄慕范文正公之睦族
生理潼關同治元年秦亂設救生船數隻拯活無算光
緒丁丑戊寅大稔捐金出粟以賑村眾邑侯洪公貞頤

永濟縣志

卷十三

義行

五十

以樂善好施榜其門長子文蔚庠生次子文發例授州
同銜

耆壽

崔居和性溫慎事父母以孝聞端方自持與人無競乾隆
初元 恩賜八品頂戴享壽七十有七

崔效廉字介庵氣度端凝守正不阿年九十有七步履飲
食不啻壯者族姪河南南汝光道景儀書令德壽愷榜
其堂

趙俊字秀實家貧爲富家賈於江南勤儉著聞忠於所事
禮遇文士有急輒資之而非義不取同人俱不忍欺年
老歸里享壽八十有五見五世孫主人感甚於其歿也

永濟縣志

卷十三

耆壽

五十一

設主致祭焉

楊養福字積善幼食貧棄儒治岐黃術能醫人所不能醫
性剛直鄉中子弟不馴者輒訓誡呵責之皆不敢犯捐
貲集眾立宗祠築寨牆眾共賴之同治初元年逾八旬
遵例舉報 恩賜壽官至光緒元年年晉九袞步履如
壯鄉里仰慕以德壽旌之今相國閻大司徒獎以耆德
人瑞四字卒年九十有五子二長繼文庠生次繼科